


*a cura di Salvatore Corso*

*foto di Lorenzo Gigante*

**TANGI**  
**«A VIA CRUCIS»**



## TANGI: «'A VIA CRUCIS»




TANGI (probabilmente dall'arabo: timpuni/altura) è un borgo tra Ballata e Buseto Palizzolo, ormai con pochi residenti ed una chiesa parrocchiale all'imboccatura di una delle vie in cui si inerpicava l'abitato.

Chi guarda la chiesa, trionfalistica e di dimensioni sproporzionate, non può evitare di ammirare, piantato sul sagrato, un blocco di pietra appena sbozzato, appositamente distanziato da altro, poi altro e in curva altro ancora, e ancora...ancora. Ogni blocco, segnato da numerazione romana, porta incise figure stilizzate a tratti lineari rossi ed un titolo a margine, in siciliano. I blocchi di pietra proseguono per una via in salita per centinaia di metri e giungono ad uno spiazzo, dove si erge una croce e c'è una cappelletta. E la via poi scende per altro versante verso Crocci di Valderice. Ecco una caratteristica *VIA CRUCIS* da ripercorrere, anche per ammirare l'opera artistica ispirata a brani evangelici e scolpita da VITO LOMBARDO, allora parroco del borgo.

A corredo qui si inseriscono 14 *LAUDI* di anonimo, in siciliano, liberamente rielaborate da SALVATORE CORSO.

Immagini ed impaginazione di LORENZO GIGANTE.



## I - Giovanni 13,1-17

### LAVAMI

Quannu arrivàu 'a Pasqua d'a Judia  
 Jesu ci dici: "Mangiati cu mià"  
 e mentri Juda a trarillu tramava  
 di vesti 'u Maestru si spugghiava.

Addinucchiuni ci vulia lavari 'i peri  
 E Petru dicia : "Nun mi tuccari".  
 "Petru, si nun ti farai lavari,  
 n'o' Regnu cu mia nun poi viniri.

Ora sapiti soccu avit' a fari  
 comu fici iò cu granni amuri:  
 l'esempiu meu aviti a siguitari  
 tuttu si fa p'u nomi du Signuri".





## II - Marco 14, 32-40; Matteo 26, 36-46; Luca 22, 39-46

### VIGGHIATI E PRIATI

All'ortu di Jetsemini arrivàu  
e ddocu priava 'u nostru Diu:  
taliau 'n celu, e 'n menti sua pinsau  
i surura di sangu chi spargiu.


Juda trattau ch'i capi d'a Judia  
e 'a munita fu trenta dinari,  
poi cu l'anziani cunsigghiu tinìa  
cuviaunu 'u trarimentu c'avìa a fari.

Dissi Juda: "Lassàti fari a mia  
e a Jesu 'mputiri v'aiu a dari;  
iddi sunnu quattu d'a cumpagnia,  
ma, a cù vasu iò, v'aviti a pigghiari.

Jesu dissì a l' apostuli: "Vigghiati!  
veniri sentu 'na gran cumpagnia,  
lesti, lesti, susitivi, taliati:  
chistu è Juda chi veni pi mia".

Fu ddu vasu triulu trarituru  
a fari 'ngannari puru 'u Signuri:  
l' apostuli nenti nenti vigghiaru  
e a Jesu i sbirri si purtaru.





### III - Giovanni 18, 1-9

#### A CU CIRCATI



“A cu circati? Io era pi via”.

“O Nazarenu vinnimu arristari!”

“Sugnu iò”, rispunnìu ‘u Missia:  
chissa fu parola c ‘un s’avi a scurdari.

Tuttu ‘mpappatu Juda l'abbrazzau  
e la lanterna ‘n facci ci mittiu,  
di nomi “Maestru” lu chiamàu  
ma Jesu zittu, nun c’ arrispunnìu.

Cu l'occhi 'nterra cchiù nun lu talia,  
vasannu a bedda facci s' arrassau;  
prestu e lestu si nni va p ‘a so via:  
e cu stu vasu Juda l’ammazzau.



#### IV – Marco 14, 66-72; Luca 22, 54-62; Matteo 26,69-27,10

### U NNU CANUSCIU


Dopu c'arristaru a Jesu Missia e Petru di luntanu si canziava "Tu apparteni a so' cumpagnia" ci dissi 'na fimmina chi lu taliava.

Pilatu 'ntisi 'a 'nnimma e lu chiamàu: "Veni ccà tu, vecchiu d'a Canania: U canusci st'omu?" Iddu nigau, scantatu dissi ch' unn'u canuscìa.

Tannu, tri voti 'u 'addu cantau e Petru d'a minzogna si pintiù: 'n cori so' pirdunu addumannau e pi tutta la vita poi chianciu.

A Petru pintutu 'u pirdunau 'a granni misiricordia di Diu. Juda, ch'era sbirsatu, si dannau e a l'abbissi prufunni s'inni iu.





## V - Giovanni 18,29-19,22


### JESU NAZARENU RE DI JUREI

Ch'i matinati a Pilatu purtatu:  
 re di Jurei nun s'avi a vantari.  
 Pilatu, ch'era di Roma scantatu,  
 'u mannau a frustari e... cutuliari

Pilatu 'n Tribunali avia parlatu:  
 " Nenti truvai 'na st'omu 'nnuccenti:  
 chi fici pi essiri cunnannatu?"  
 Poi 'ntisi vuci d'i mali genti .....

vuciavanu "Barabba libbiratu!"  
 e l'anziani pungianu "Fa prestu".  
 Pilatu d'a muggheri era avvisatu:  
 "Nun ti macchiari ddù sangu di stu justu".





**VI - Matteo 27, 27-30; Marco 15, 16-20; Giovanni 19,1-7**



### **ECCU L'OMU**

Curuna di spini e canna 'n manu  
"Eccu - dissi - l'omu arridduciutu  
purtatilu fora città, luntanu:  
picchè a morti io l'aiu cunnannatu!"

Sulu ristau chiamatu Re Missia  
di l'amici tutti abbannunatu  
e sta patennu, nuddu lu talia  
arrancari stu vili scilliratu.






## VII - Giovanni 19, 16-18

### SI CARICAU

Supra ddu corpu tantu marturiatu  
supra ddi spaddi ccussì scunsintuti  
lignu raspu su cu forza è 'ncarcatu  
di sti surdati di Roma vinuti.

Rumpia l'ossa sta cruci pisanti  
pi purtarla sulu 'ncima a ddu munti  
ci voli l'aiutu di tutt'i santi  
picchè è lignu di peni e turmenti.





## VIII - Matteo 27, 31

### 'A CARUTA

Strurutu, nun s'a fira a camminari  
acchiana frustatu, 'mpinci a ogni passu.  
Cruci di lignu nun si po' purtari:  
scunsintutu pari, di siti arsu.

E cari 'n terra, pistatu d'a cruci:  
ci voli cu l'aiuta a purtari;  
oramai è curvatu, senza vuci  
camina a stentu, senza catuniari.





## IX - Marco 15, 21-25; Luca 23,26; Matteo 27, 22

### P'AIUTALLU

D'a campagna Simuni di Cireni  
 è suratu d'un jurnu di travagghiu,  
 ma davanti a sta scena si tratteni  
 pinsirusu, strittu strittu 'u baccagghiu.

Viri luntana a paci d'a so' casa,  
 pigghiatu p'aiutari 'u cunnannatu,  
 comu mazzu d'ossa ch 'in terra posa  
 chi trascina stu lignu disgraziatu.

Simuni è furzatu sutta sta cruci,  
 tuttu siddiatu senza pipitari:  
 prima chi scura jornu senza luci  
 'n cima a ddu munti s'avi arrivari.





## X - Luca 23, 27-31

### NUN CHIANGITI

E mentri Jesu porta 'a sò cruci  
fimmini caminanu cantu cantu  
chiancennu cu lamentu e facennu vuci  
battennusi 'u pettu sutta 'u mantu.

Virennu Jesu sta pinusa scena  
ci dici: "Figghi di Jerusalemmi,  
nun chianciti supra a mia sta pena,  
supra viautri chianciti lemmi lemmi:

suspiri e lacrimi d'u cori ittati,  
pi figghi vostri cchiuttostu chianciti  
chi sunnu na stu munnu di piccati  
e ogni jornu pi iddi patiti".





## XI - Giovanni 19, 23-24; Matteo 27,27-31


### SQUARTARU LU MANTU

Comu s'arrivau o munti Calvariu  
Jesu è spugghiatu e squartatu 'u mantu:  
nuru, tuttu sfriggiatu, puru lariu:  
nuddu pinsava d' arrivari a tantu!

I surdati afferranu cu disprezzu  
l' autri 'mmarazzi e fannu quattru parti:  
sta bedda vesti, 'ntissuta d'un pezzu,  
è 'a tunica chi jocanu a sorti.

Di tutt 'u puntu Jesu è spugghiatu  
unn' avi cchiù nenti, sulu e nuru  
tutti virino stu corpu straziatu,  
stinnighiatu supr'o tirrenu duru.






## XII - Luca 23,32-37; Matteo 27,38-50



### PATRI PIRDUNALI

Supra 'a so' cruci Jesu è stiratu  
chi vrazza aperti e chi peri 'ncucchiati,  
marteddu pi ch'inchiuvalu è preparatu  
e tri chiova puntuti su' chiantati.

A cruci abbucca sutta tantu pisu  
tirannu Jesu chi pari svinutu,  
supra a sò testa c'è scrittu n'avvisu:  
e c'u passa viri e s'arresta mutu.



### XIII - Luca 23, 39-46; Giovanni 19, 25-30

#### RICORDATI DI MIA

Tra duluri criscenti e granni affannu  
prima chi morti si lu rutulia  
Vucia : "Patri, pirduna, nun sannu  
chiddu chi fannu": e 'a testa firria.

Davant'a cruci a so' mati Maria  
di Juanni accumpagnata, dici:  
"Chissu t'è figghiu a postu di mia ";  
a Juvanni: "È mati e nun ti fici".

A 'nu latruni ch'ù talia 'n visu  
e malirici l'autru dannatu  
Jesu ci duna un postu 'n paradisu  
e a Diu vucia e spira straziatu.





## CAMINANNU P'U SEPULCRU

C'un ferru puntutu spunnanu un ciancu  
sfreggiannu stu corpu e la so' sorti,  
d'u tagghiu ci nesci acqua c 'u sangu:  
veni timpesta pi strati e pi porti.

A unu a unu i tri chiova livati  
viri Juvanni tutt' arrimuddutu  
assist'a sò matri chi vrazza raputi  
pi stringisi 'o cori stu figghiu amatu.







**XIV - Giovanni 19,38-20,18; Matteo 27,57-28,20;  
Marco 15,42-16,19; Luca 23,50-24,52**

### **NUN C'È CA': RISUSCITAU**

Juseppi d'Arimatea, l'amicu,  
sta pigghiannu stu corpu senza ciatu  
e n'ò linzolu di so' mogghi cucitu  
ci posa stu corpu senza tabbutu.

Prontu 'u sepolcru 'nta timpa scavatu,  
p'ù corpu di Cristu è novu e bonu:  
pi iddu Juseppi l'avi accattatu,  
c'a petra è chiusu e pari un tronu.

Dopo tri jorna ammatula circaru:  
risuscitau, vistu di Maria  
e puru 'a petra l'angiuli livaru:  
lu vitti Petru e tutta 'a cumpagnia.





Resta 'u sepulcru apertu vacanti  
e p' u munnu curri a so' parola:  
si fannu cristiani e sunnu tanti  
e fin' a st' jornu e sempri... ancora



*Realizzato in proprio*

*per il sito  
[www.trapaninostra.it](http://www.trapaninostra.it)*

*incisioni in pietra  
di Vito Lombardo*

*su LAUDI di anonimo siciliano  
elaborate da Salvatore Corso*

*foto e impaginazione di  
Lorenzo Gigante*

*24 marzo 2013*

